



UNIVERSITÄTS-
BIBLIOTHEK
PADERBORN

Universitätsbibliothek Paderborn

Ioannis S. R. E. Cardinalis Bona Opera Omnia

Tribus Tomis comprehensa

Opuscula Spiritiva - I. Horologium Asceticum. II. Principia Vitae Christianae. III. Manuductio ad Coelum. IV. Via Compendii ad Deum. V. De Sacrificio Missae. VI. De Discretionem Spirituum ... Operum Eminentiss. Cardinalis, Tom. I

Bona, Giovanni

Parisiis, 1677

Cap. 17. Vitam Christi esse fontem omnium bonorum: Quomodo ex ea pii affectus eliciantur

urn:nbn:de:hbz:466:1-9969

contagionis expers ; & sanctus sicut tu curram inoffenso pede viam mandatorum tuorum.

8. Spiritus Patris , à quo accipis divinitatem & omnipotentiam : Spiritus Filii , à quo accipis ejusdem sapientiam : Spiritus utriusque , à quibus accipis infinitum amorem , quo se mutuò amant ; illabere menti meæ & fac concordiam in affectibus meis , ut jungar tibi in uno spiritu , & totus convertat in spiritum amoris.

9. Sanctissime Spiritus & Amor suavissime , charitas essentialis & totius charitatis principium , bonitas æterna , à qua omnia bona in nos descendunt : inflamma voluntatem meam ferventissimo tui amore , & adstringe me tibi , ac Patri & Filio ; ut nec intellectu , nec affectu à vobis divellar.

10. Sancta & adoranda Trinitas , Deus meus & omne bonum meum , da teipsum mihi & sufficit mihi. Quid enim ei sufficiet , cui tu non sufficis ?

CAP. XVII. *Vitam Christi esse fontem omnium bonorum. Quomodo ex ea pii affectus eliciantur.*

Prolixi voluminis opus foret bona omnia commemorare , quæ ex vita Christi velut ex fonte uberrimo & nunquam deficiente scaturiunt & perenniter fluunt. Ipse enim Salvator noster factus est nobis à Deo sapientia , justitia , redemptio & sanctificatio. In ipso habemus divitias salutis , thesaurum meritorum , cumulum perfectionis. Sicut Sol aspectu suo lætificat , influit , illuminat , nec unquam cessat operari : ita verus Sol animarum Jesus Christus jugi influxu infundit in nos & imprimat mores suos , virtutes suas , suam Divinitatem. Vitæ ejus consideratio erigit in adversis , in prosperis reprimat , tollit peccata , conciliat gratiam , excitat ad amorem , juvat incipientes , dirigit proficientes , edocet perfectos. Quemadmodum unguentarii semper olent id quod attrectant ; sic Christianus , qui assiduè cum Christo versatur , ejus redolet patientiam , charitatem , humilitatem , cæterasque

virtutes, quas vitæ suæ studio sensim instillat idem Dominus virtutum, cujus doctrina seminarium justitiæ, vita speculum prudentiæ & temperantiæ, mors exemplum est fortitudinis. Sed quia non sufficit Christi vitam meditari, nisi etiam ex ea pii & devoti affectus eliciantur, hujus rei praxim in hoc capitulo breviter indicabo, ut auctorem fidei respicientes, eundem salutis nostræ atque perfectionis consummatorem habeamus.

DECAS I.

1. **D**omine Jesu Christe, concede mihi misero peccatori vitam & mores tuos præ oculis mentis semper habere & pro viribus imitari.
2. O charitas infinita, ô admiranda dignatio tua, Domine! ut servum redimeres Filium tradidisti.
3. Vidisti, suavissime Jesu, afflictionem populi tui & grave onus filiorum Adam; & tactus stimulis charitatis intrinsecus cogitasti super nos cogitationes pacis & redemptionis: Nam ubi advenit plenitudo temporis, visitasti nos oriens ex alto.
4. Deus immensæ majestatis, quid est homo, quod memor es ejus, aut filius hominis, quoniam visitas eum? Laudent te Angeli tui ob tantum amorem, quo nos miseros prosequeris.
5. Salve dies tot ætatibus optata, qua Deus pro nobis factus est homo. Salve Gabriel Archangele tanti gaudii annunciator. Salve Virgo gloriosa, in cujus castissimo utero carnem assumpsit Deus.
6. O quàm potens es Amor, qui ad tam infima abjicis Deum! O quàm divino dissimilis est amor meus!
7. Princeps supreme, qui de Cœlo in terram pro mea salute descendisti, tanto mihi charior es, quanto pro me factus es vilior.
8. Verbum incarnatum plenum gratiæ & veritatis, eadem gratia imple animam meam, ut tibi placeat.
9. Verbum divinum partem aliquam largire mihi lucis

& gratiarum, quas tribuisti assumptæ humanitati. Depri-
me cor meum humilitate usque ad infimum locum :
erige gratitudine & amore ad altissimum gradum.

10. Christe Salvator, qui adhuc clausus maternis vis-
ceribus ad Præcursores sanctificandum properasti, da
mihi peccatorum veniam & spiritualem in tuo obsequio
lætitiã.

DECAS II.

1. **J**esu amabilissime, qui pro me nasci in sordenti sta-
bulo voluisti, illumina mentem meam, & volunta-
tem, quo tuam Nativitatem contemplari valeam & elu-
centes in ea virtutes imitari.

2. Cur non ardet cor meum tenerrimo tui amore, In-
fans formosissime, qui salutem meam in ipso tui ortu ope-
rari cœpisti?

3. Utinam Nativitati tuæ præsens fuisset, dignusque
habitus, qui te amplecterer & mea tibi obsequia defer-
rem! Accepta, Domine, hanc voluntatem & præsta, ut
quicquid possum, quicquid sum tuo semper famulatu impend-
dam.

4. O inaudita amoris prodigia! Dilecti mei cubile, sta-
bulum est; desponsationis meæ thalamus præsepe; lectus
sponsi mei fœnum; pulvillus, stramen; aula, vilis spelunca.

5. O sanctam Filii Dei paupertatem, omnibus mundi
divitiis pretiosorem! hanc mihi commendabilem tuo
exemplo reddidisti, bone Jesu, natus in stabulo, pannis
involutus, qui Cælum stellis, terram floribus adornasti.
Infunde cordi meo ejus amorem & da patienti animo ejus
molestias perferre.

6. O quantum lugere debeo pro peccatis meis, piissime
Jesu, quandoquidem tu pro eis ploras! Me enim abluunt
vagiens tuæ infantia fletus, mea delicta tuæ deplorant
lacrymæ.

7. Jesu sapientissime, qui tacendo doces & vagiendo
prædicas; doce me in silentio humilitatem tuam sequi, ti-

bique conformem fieri infantili simplicitate & innocentia.

8. Fortunati Pastores, quibus ante omnes lapsus è Cælo Deus, stabuloque reconditus angelica voce nuntiatur!

9. Verè gloria in excelsis Deo: nam cui gloria, nisi tibi Rex gloriæ? Trahe cor meum in excelsa, ut nunquam degenerem ab excelsis cogitationibus filiorum tuorum.

10. Da mihi, Salvator dulcissime, quam omnibus offers bonam voluntatem; pacemque divinam, ut abjecta mundi inconstantia & discordia in beneplacito tuo stabilis perseverem.

DECAS III.

1. **L**Audo te, redemptor mundi, pro prima sanguinis tui in tenerrima ætate effusione, cum tua caro immaculata pœnam circumcisionis, quam non meruit, sustinuit.

2. O lapsus Adæ, quàm es amarus Domino meo! ego peccavi & tu Domine, pœnam exolvis: ego in concupiscentia conceptus & natus sum, & tu suscipis in te ultionem.

3. Sponsus sanguinis tu mihi es, qui cum voce nondum possis, ipso cruore tuo clamas pro me ad Patrem; mihi-que tribuis arrham desponsationis sanguinem tuum preciosum super aurum & topazion.

4. Circumcide, Domine, omnia membra & sensus meos spirituali petra, quæ tu ipse es, & quicquid in me repereris carnale & superfluum, abscinde & extirpa; vitamque meam disciplinæ tuæ rigore coërce.

5. O dulcissimum nomen Jesu, super omne nomen in Cælo & in terra benedictum, esto mihi salus & redemptio: non enim est aliud nomen hominibus datum, in quo oporteat nos salvos fieri.

6. Esto mihi, Jesu, id quod diceris. Esto mihi turris fortitudinis à facie inimici. Scribe nomen tuum salutiferum in corde meo, ut ibi maneat semper impressum, donec

nec perducatur ad æternam salutem.

7. Glorifico te Deus, pro primitiis gentium, & earum admirabili illuminatione, cum eas ob oriente in personam trium Magorum ad fidem tuam secreta inspiratione traxisti.

8. Adoro te, Rex Regum, cum sanctis Magis, & pro illorum manibus offero tibi aurum paupertatis, thus obedientiæ, myrrham castitatis.

9. Utinam omnes gentes te fide viva cognoscerent, & adorarent & tibi fideliter servirent!

10. Da mihi, Domine, horum virorum fidem & constantiam, ut eadem, qua illi, perseverantiâ te quæram, donec inveniam.

DECAS IV.

1. **V**oluiti, Domine, præsentari in templo & more servorum quinque siclis redimi: sit benedicta immensa charitas tua: & quia Pater tuus te mihi tradidit quinque siclorum pretio ego vicissim trado me tibi in servum perpetuum. Fiat per gratiam tuam, ut nec tu me unquam deseras, nec ego te.

2. Benedico te, sanctissime Redemptor, quia ut nobis veræ obedientiæ exemplum relinqueres, te legalibus institutis, tanquam unus de populo subdidisti. Da mihi in omnibus perfectissimam obedientiam.

3. Offero tibi, Domine, par turturum, geminam scilicet compunctionem; primo quidem pro peccatis, & negligentis meis, deinde vero pro æterna felicitate, ad quam jugiter suspiro.

4. Da mihi, bone Jesu, radium aliquem illius lucis, quam sancto seni Simeoni tribuisti, cum te infantem in ulnas suas suscepit, ut te agnoscam & amem, sicut ille te novit & amavit.

5. Sapientissime Jesu qui sanctæ Genitrici tuæ doloris gladium, quo transfigenda erat, revelari voluisti, transfige animam meam gladio compunctionis, ne me dissol-

C. Bona. Opusc. Spirit.

K k

vant vanæ mundi consolationes.

6. Vix natus eras, Rex amantissime, cum subito mundus te persequitur, & Rex Herodes statim te quærit, ut perdat te, sicut autem te caput bonorum persecuti sunt impii, ita & membra tua. Da mihi igitur hanc veritatem agnoscere, & malorum persecutiones patienter ferre.

7. Tecum fugere, Jesu dulcissime, & omnia quæ mundi hujus sunt relinquere, grave mihi non erit: nam si tu mecum fueris, quid poterit mihi deesse?

8. Comitare fugientem Deum, anima mea, nec erubescere ad hanc fugam. Gloriosum est & dulce pro Deo abjici & contemni.

9. Adesto mihi, Deus, gratia tua, ut in hujus vitæ exilio, voluntati tuæ subjectus vivam, semper bonum exemplum illis præbens, cum quibus vixero.

10. Dulcis Jesu, qui revocatus ab Ægypto, ubi exul diu fuisti, in Nazareth secessisti, & Nazaræus vocatus es; da mihi leges Nazaræorum spiritualiter observare, abstinere nimirum ab omni amore inordinato, & nihil tangere quod possit maculare animam meam.

DECAS V.

1. **N**ihil scimus de te, ô Sipientia incarnata, usque ad annum duodecimum ætatis tuæ, & multa scimus. Ipsa enim taciturnitas tua clamat in cordibus nostris; ut silentium tuum, & humilitatem admiremur & imitemur.

2. Sedisti in medio Doctorum, sapientissime puer, interrogans prudenter & respondens modeste, ita ut omnes mirarentur. Utinam illic adfuisset, & sermones tuos audire licuisset! Repete eos, Domine, in corde meo, ut fructu eorum perfruar in æternum.

3. O quam dolenter quæsit te amissum mater tua, quam lætanter te invenit! Da mihi exemplo tuo in his semper esse, quæ Dei sunt, nulla habita ratione cognationis, & sanguinis: & fac, ut te absentem sollicitè semper quæram, donec inveniam.

4. Congratulor tibi, Beatissima Virgo, quod dilectissimum tuum inveneris: ora pro me, ne unquam illum amittam, aut ab eo discedam.

5. Proficiebas, dulcissime puer, sapientia, ætate, & gratia apud Deum, & homines; quia majora quotidie edebas virtutis indicia, ego autem proficere opto à remissiori vita ad ferventem & perfectam. Da tu mihi benedictionem tuam, ut juxta desiderium meum crescam de virtute in virtutem, donec ad gradum supremum perveniam.

6. O humilitas Christi quantum confundis superbiam & vanitatem meam! Tu latuisti, Domine & tacuisti usque ad trigesimum annum, cum esses sapientia æterna: ego verò stultissimus cum sim, inaniter loqui præsumo & apparere. Doce me viam solidioris humilitatis, & tuis semper inhærere vestigiis.

7. Domine Jesu, fons bonitatis & origo virtutum, qui à baptismo Joannis prædicationem tuam auspicatus es, quid tibi & baptismo isti, cum sis innocentissimus? Utinam superbia mea hoc tam mirabili humilitatis exemplo exterminetur!

8. Rex altissime, qui omnem justitiam sic implere voluisti, baptiza me in igne & spiritu, & ablue animam meam ab omni sorde iniquitatum.

9. Imple me, Domine, Spiritu Sancto, ut eo inspirante sequar te in desertum & secedam ab hominibus, orationi, jejunio & pœnitentiæ incumbens.

10. Fortissime athleta, Jesu Christe, qui strenuè contra Diabolum dimicasti, & eum gloriosè superasti; da mihi viriliter contra ipsum decertare & mitte sanctos Angelos tuos, qui me fideliter custodiant, potenter adjuvent & benignè consolentur.

DECAS VI.

x. **C**onfiteor tibi Pater, Domine cæli & terræ, quia Redemptionis nostræ mysteria abscondisti à sa-

pietibus, & prudentibus hujus seculi, & parvulis piscatoribus revelasti, ut mundi sapientiam destrueres. Fac me parvulum in oculis meis, ut magis fiam in tuis.

2. Dux supreme, qui omnes ad te vocas per viam crucis & abnegationis, gratiam tuam largire mihi, ut crucem meam indefessus portem usque ad mortem.

3. Aliam viam, Domine, tenere nolo, quam tuam: nec aliam, quam tuam veritatem amplecti: nec aliam vitam ducere, præter eam, quam tu docuisti. Tu es enim via, veritas & vita.

4. Gratias ago tibi, æterne Pater, quod talem mihi magistrum, legislatorem, & consiliarium dederis, cujus præcepta & monita via tutissima salutis sunt.

5. Aperi os tuum, Salvator mundi, & loquere ad cor meum, quia audit servus tuus, desiderans id exequi quod audierit.

6. Illumina me splendoribus tuis superne Magister, ut perfectionem agnoscam, quam mihi commendas: igne tuo accende, ut eam amem: potentiâ corrobora, ut eam quæram & assequar.

7. Salvator potentissime, qui tot miracula verbo virtutis tuæ patrare dignatus es; innova signa, immita mirabilia, & animæ meæ languores sana, eamque resuscita à morte vitiorum.

8. Inclyte Jesu, lux mundi, salus populi, & gloria nostra, respice propitius infirmitatem meam; nemo enim potest spiritualia vulnera curare, nisi tu qui solus es Deus.

9. Circuisti vicos & plateas, dulcissime Jesu, ut peccatores converteres, & pœnitentibus indulgentiam conferres: fac me hujus charitatis tuæ participem, & miserere mei, quoniam iniquitatem meam ego cognosco.

10. Millies te laudo, & benedico, Jesu sanctissime, exemplar omnium virtutum pro vita tua pauperrima, humillima, purissima, patientissima: tribue mihi miserrimo servo tuo mores tuos sedulo meditari, & ad eorum

normam omnes actus, sermones, & gestus meos efformare.

DECAS VII.

1. **Q**Uàm immensa fuit charitas tua, benignissime Redemptor, quia non solum pro salute mea vitam ærumnosam ducere, sed eam insuper acerbissima passione & morte claudere voluisti! O quàm gravia sunt peccata mea, quæ talem poscebant satisfactionem!
2. Clementissime Pater, per passionem & mortem Unigeniti tui ignosce peccatis famuli tui. Suscipe sacrificium filii tui, & obliviscere injuriarum nequissimi servi tui. Multo enim plura ille solvit, quàm sit debitum meum.
3. O passio Christi desiderabilis! ô amabilis mors, sana vulnera mea, & vivifica me: inflamma pectus meum, ut præ amore lique scat.
4. Non peto mundi divitias, sed tuas angustias, Domine Jesu: non carnis delicias, sed tua flagella.
5. Rogo te, dulcis Jesu, ne finas unquam me oblivisci mortis & passionis tuæ, sed præsta, ut in ea mihi sit requies & accessus ad Divinitatem.
6. Omnia vulnera tua, Domine, inscribe cordi meo, ut tu solus, tuaque passio in eo legantur. Intra vulnera tua absconde me.
7. Domine Jesu, qui nos sic amasti, ut tibi non parceres, veni; & ne differas vulnerare cor meum, ut solum tua vulnera sentiam & in iis jugiter maneam & requiescam.
8. Tui dolores semper occupent pectus meum, ut eorum memor dicam cum sponsa: Fasciculus myrrhæ dilectus meus mihi, inter ubera mea commorabitur.
9. Dulcis Jesu, qui tanto fervore & festinatione in Hierusalem ascendisti, ut durissimam mortem pro me patereris, fac me alacrem & ferventem ad omnia quæcunque volueris pro te sustinenda.

10. Salvator mundi, qui à perduto discipulo venditus fuisti, ne quæso permittas, ut pro vili pretio rerum terrenarum te summum bonum meum vendam & derelinquam.

DECAS VIII.

1. **H**umillime Jesu, qui servili obsequio lavisti pedes discipulorum tuorum, amplius lava me ab iniquitate mea, & à spiritu superbiæ libera me.

2. O dilecte cordis mei, qui imminente passione tua perpetui amoris tui pignus immensum reliquisti nobis, corpus tuum scilicet in cibum, & sanguinem in potum; præpara me ad hoc convivium, & orna animam meam virtutibus tuis.

3. O Rex supreme, qui nutris sanguine tuo populum tuum, ut simus omnes de regio tuo sanguine genus electum, regale sacerdotium, gens sancta: fac me agnoscere genus meum, & de eo gloriari, & à moribus tuis nunquam degenerem esse.

4. Ut passio tua esset acerbior, amabilissime Jesu, omnem lætitiã à te procul abjecisti, incipiens pavere, contristari, & mœstus esse, & ubi dolor meus in causa tua & mea? Fac me semper memorem tristitiæ tuæ, ut omnem angustiam quacumque ex causa mihi advenientem, pro tui nominis gloria libenter patiar.

5. O lætitiã Angelorum, qui in tristitia tua ad orationis remedium confugisti, concede mihi misero, ut ablaçter à lacte, & avellar ab uberibus humanarum consolationum, meque totum orationi applicem, in qua sanctissimam voluntatem tuam & cognoscam & exequar.

6. Transeat à te, Domine, ad me calix tuus: omnis enim amaritudo pro te degustata erit mihi jucundissima.

7. Quis mihi det dolores tuos ita sentire, afflictissime Jesu, ut vel eorum cogitatio sanguineum à me sudorem eliciat? Adjuva me gratiã tuã, ut voti hujus compos efficiar.

8. Laudo & glorifico te, mitissime Jesu, pro tua inefabili mansuetudine, quam ostendisti à perfido discipulo osculo traditus, & ab impiis comprehensus, atque ligatus: da mihi hunc spiritum lenitatis, quo erga meipsum severus sim, & erga proximum mansuetus.

9. Quàm celeriter ire cogaris à tuis hostibus raptatus, dulcissime Jesu, sed multò magis à tua charitate: ne quæso patiaris, ut à te alacriter sequendo desistam, etiamsi multi labores & dolores subeundi sint.

10. Jesu innocentissime, qui per diversa tribunalia crudeliter trahi voluisti, victima meorum criminum; dirige gressus meos in viam pacis, & jube me venire ad te; nam etsi oportuerit me mori tecum, non te negabo.

DECAS IX.

1. **O** Bone Jesu, virtus & fortitudo animæ meæ, qui tot irrisiones, percussiones, & contumelias admirabili patientia tolerasti, doce me omnia mihi adversantia mihi silentio vincere, & tranquillo corde suscipere.

2. Piissime Jesu, qui nequissimo latrone & homicida nocentior proclamatus fuisti, fac me vana hominum judicia contemnere, & opprobrium tuum semper præ oculis habere, falsisque mundi honoribus præponere.

3. Mitissime Jesu, qui nudus ad columnam alligatus & durissimè propter scelera mea flagellatus fuisti; concede animæ meæ, ut diuturnis criminum tempestatibus jactata in hac columna portum inveniat. Liga me ad eam in funiculis Adam, in vinculis charitatis.

4. Rex Christe, corona Sanctorum omnium, qui inaudito supplicio spinis coronatus fuisti, & joculari purpura indutus; fac me omnem contemptum patienter ferre, atque in gloriam omnibus apparere, tuasque spinas semper amare.

5. Benignissime amator hominum, qui ab iniquo judice morte turpissima damnatus fuisti, cum sis speculum innocentiae & sanctitatis: quanto magis me pati oportebit si-

nistra hominum iudicia, qui in multis tam sapè deliquisti

6. Proficiscere, bone Jesu, ligno crucis onustus, sed multo magis amoris pondere pressus; & qui dolori tuo non parcis, parce peccatis meis.

7. Jugum tuum, Domine, suave est, & onus tuum leve, fac ut illud gaudenter portem, abnegans memetipsum, & crucem meam bajulans post te.

8. Suavissime Jesu, qui tam inhumaniter in cruce extendi voluisti, ut numerari possent omnia ossa tua: præsta ut omnia membra, sensus & potentias ad te semper eretas tibi amanter uniam, & clavis timoris tui cruci tue perpetuò affixus maneam.

9. Ad te, Domine, clamantem exaudi, & qui dixisti Apostolis tuis: Cum exaltatus fuero à terra, omnia traham ad me ipsum; trahere me ad te, & excipe animam meam in foraminibus petrae, in cavernis maceriae.

10. Agnosco, gloriosissime Fili Dei, titulum tuum; tu es enim Jesus Nazarenus Rex Judæorum. Utinam orbis universus hunc titulum legat, & admittat, teque omnes confiteantur Regem suum & Salvatorem.

DECAS X.

1. **J**esu vita morientium, qui cum jam mortuus esses pro nobis, latus tuum lancea aperiri voluisti, ut accedentibus ad te facilis pateret aditus ad cor; admitte me in latus tuum, ut in eo sit requies mea in seculum seculi.

2. O quinque Christi pretiosa vulnera, divina dulcedine plena, saluto & veneror vos: in vobis enim medicina vitæ, copia gratiæ, plenitudo indulgentiæ.

3. In laterè tuo latere volo, Jesu mi crucifixe, ibi orare, ibi tractare negotia mea: quia ibi quicquid voluero obtinebo.

4. Gratiarum ago tibi, Salvator mundi, quia opus Redemptionis nostræ perfectissimè peregisti: perfice & in me opus quod incœpisti, ut plena in me, & consummata justitia reperiatur.

5. Quanta duritia cordis mei! concutitur terra, dissiliunt saxa, obtenebrantur cœli, moriente Domino: solum cor meum immotum erit, qui tantæ necis causa fuit? Scinde illud, Domine, & frange sanguine tuo.

6. Sepeli cor meum tecum, & absconde me intra vulnera tua, dilectissime Jesu, ut extra te nusquam reperiar.

7. Obsigna cor meum, Domine, & sensus ac facultates sigillo charitatis tuæ, ut sic obsignatus tecum maneam in æternum.

8. O Rex gloriæ, Domine virtutum, qui post mortem descendisti ad inferos, & justos è carcere eduxisti, gaudeo de hoc tuo triumpho, & precor, ut omnem tartaream potestatem virtute tua vincere me facias.

9. O Triumphator gloriosissime, fac me participem passionis tuæ, ut sim etiam resurrectionis: tecum moriar, ut tecum resurgam, & tecum tandem ascendam in cœlum.

10. Rex sempiternæ, qui sedes ad dexteram Patris, trahe me post te, ut illic semper fixum sit cor meum, ubi tu es thesaurus meus, & gloria mea, Deus cordis mei, & pars mea Deus in æternum.

CAP. XVIII. *Ex qualibet re qua occurrit, motus anagogicos elici posse. Scala à visibili creatura ad invisibilem Creatorem.*

1. **O**ptimè dictum est à Redemptore nostro filios hujus seculi prudentiores esse filiis lucis in genere suo. (a) Nam quis ex nobis, qui filiorum lucis nomine censetur, tantam adhibet industriam in spiritualibus bonis procurandis, quantam mundani homines in terreno lucro ex omni re solertissimè captando? Languet nimirum spiritus, & vigent sensus: & quia cœlestia ab oculis corporalibus remota sunt, mentem humanam vix percellunt: atque ideo plerumque fit, ut in temporalibus

* LUC. 16, 8.